

淮安府志(光緒) 六

ISBN 988-978-316-9



二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一三三八七九〇〇

定價：人民幣 九五〇〇元（全書共三百一冊）

淮安府志卷三十三

人物

安東縣

漢

陳球字伯真下邳淮浦人也父豐廣漢太守球少涉儒學
善律令陽嘉中舉孝廉稍遷繁陽令時魏郡太守諷縣求
納貨賄球不與之太守怒而撾督郵欲令逐球督郵不宥
曰魏郡十五城獨繁陽有異政今受命逐之將致議於天
下矣太守乃止復辟公府舉高第拜侍御史是時桂陽黠
賊李研等羣聚寇鈔陸梁荆部州郡懦弱不能禁太尉楊

秉表球爲零陵太守球到設方略期月閒賊虜消散而州
兵朱蓋等反與桂陽賊胡蘭數萬人轉攻零陵零陵下濕
編木爲城不可守備郡中惶恐掾史白遣家避難球怒曰
太守分國虎符受任一邦豈顧妻孥而阻國威重乎復言
者斬迺悉內吏人老弱與共城守弦大木爲弓羽矛爲矢
引機發之遠射千餘步多所殺傷賊復激流灌城球輒於
內因地勢反決水淹賊相拒十餘日不能下會中郎將度
尙將救兵至球募士卒與尙共破斬朱蓋等賜錢五十萬
拜子一人爲郎遷魏郡太守徵拜將作大匠桓帝園陵所
省巨萬以上遷南陽太守以糾舉豪右爲勢家所謗徵詣

廷尉抵罪會赦歸家復拜廷尉熹平元年竇太后崩太后本遷南宮雲臺宦者積怨竇氏遂以衣車載后尸寘城南市舍數日中常侍曹節王甫欲用貴人禮殯帝曰太后親立朕躬統承大業豈宜以貴人終乎節等復欲別葬太后而以馮貴人配祔詔公卿大會朝堂令中常侍趙忠監議太尉李咸時病迺扶輿而起擣椒自隨謂妻子曰若皇太后不得配食桓帝吾不生還矣旣議坐者數百人各瞻望莫肯先言趙忠曰議當時定球曰皇太后以盛德良家母臨天下宜配先帝忠笑而言曰陳廷尉宜便操筆球卽下議曰皇太后自在椒房有聰明母儀之德遭時不造援立

聖明承繼宗廟功烈至重先帝晏駕因遇大獄遷居空宮不幸早世家雖獲罪事非太后今若別葬誠失天下之望且馮貴人冢墓被發骸骨暴露與賊并尸魂靈汙染且無功於國何宜上配至尊忠省球議作色俛仰蚩球曰陳廷尉建此議甚健球曰陳竇旣寃皇太后無故幽閉臣常痛心天下憤歎今日言之退而受罪徇昔之願公卿以下皆從球議李咸始不敢先發見球辭正然後大言曰臣本謂宜爾誠與臣意合會者皆爲之愧帝謂節等竇氏雖不道太后有德於朕不宜降黜議者迺定六年遷球司空以地震免拜光祿大夫復爲廷尉太常光和元年遷太尉以日

食免復拜光祿大夫明年爲永樂少府迺潛與司徒河間
劉邵謀誅宦官事未及發球書勸邵曰公出自宗室位登
台鼎天下瞻望社稷鎮衛豈得雷同容容無違而已今曹
節等放縱爲害而久在左右又公兄侍中受害節等永樂
太后所親知也今可表徙衛尉陽球爲司隸校尉以次收
節等誅之政出聖主天下太平可翹足而待也陽球小妻
鄭璜之女璜用事懼迫以球謀告節球等皆下獄死時年
六十二子瑀吳郡太守瑀弟琮汝陰太守

晉

陳邵字節良襄賁人郡舉孝廉不就以儒學徵爲陳留內

史累遷至王傅撰周禮詳解行於世泰始中詔曰邵清貞
潔靜行著邦族篤志好古博通六經耽悅典故老而不倦
宜在左右以篤儒教後爲給事卒官

唐

王義方泗州漣水人也少孤貧事母甚謹博通五經而蹇
傲獨行初舉明經因詣京師中路逢徒步者自云父爲潁
上令聞病篤倍道將往焉徒步不前計無所出義方解所
乘馬與之不告姓名而去俄授晉王府參軍直宏文館特
進魏徵甚禮之將以姪女妻之義方辭徵卒竟娶之告人
曰昔不附宰相之勢今感知已之言故也轉太子校書無

何坐與刑部尙書張亮交通貶爲儋州吉安丞行至海南
舟人將以酒脯致祭義方曰黍稷非馨義在明德乃酌水
而祭爲文曰思帝鄉而北顧望海浦而南浮必也行愆諸
已義負前修長鯨擊水天吳覆舟因忠獲戾以孝見尤四
維霧廓千里安流靈應如響無作神羞時當盛夏風濤蒸
毒旣而開霽南渡吉安蠻俗荒梗義方召諸首領集生徒
親爲講經行釋奠之禮清歌吹籥登降有序蠻酋大喜貞
觀二十三年改授洹水丞時張亮兄子皎配流在崖州來
依義方而卒臨終託以妻子及致屍還鄉義方與皎妻自
誓於海神使奴負柩令皎妻抱其赤子乘義方之馬身獨

步從而還先之原武葬皎告祭張亮送皎妻子歸其家而往洹水轉雲陽丞擢爲著作佐郎顯慶元年遷侍御史時中書侍郎李義府執權用事婦人淳于氏有美色坐事繫大理義府悅之託大理丞畢正義枉法出之高宗又敕給事中劉仁軌侍御史張倫重按其事正義自縊高宗特原義府之罪義方以義府姦蠹害政將加彈奏以問其母母曰昔王陵母伏劍成子之義汝能盡忠立名吾之願也雖死不恨義方乃先奏曰臣聞春鶯鳴於獻歲蟋蟀吟於始秋物有微而應時人有賤而言忠臣去歲冬初雲陽下縣丞耳今春及夏陛下擢臣著作佐郎極文學之清選未幾

又拜臣侍御史濫朝廷之雄職顧視生涯隕首非報唯欲
有犯無隱以廣天聽伏以李義府枉殺寺丞陛下已赦之
臣不應更有鞠問然天子置三公九卿二十七大夫八十
一元士本欲水火相濟鹽梅相成然後庶績咸熙風雨交
泰亦不可獨是獨非皆由聖旨昔唐堯失之於四凶漢祖
失之於陳豨光武失之於逢萌魏武失之於張邈此四帝
者英傑之主然失之於前得之於後今陛下繼聖撫育萬
物蠻貊夷落猶懼疏網況輦轂咫尺姦臣肆虐足使忠臣
抗憤義士扼腕縱令正義自縊彌不可容便是畏義府之
權勢能殺身以滅口此則生殺之威上非王出賞罰之柄

下移佞寵臣恐履霜堅冰積小成大請重鞠正義死由雪
冤氣於幽泉誅姦臣於白日乃廷劾義府曰臣聞附下罔
上聖主之所宜誅心狠貌恭明時之所必罰是以隱賊掩
義不容唐帝之朝竊幸乘權終齒漢皇之劍中書侍郎李
義府因緣際會遂階通顯不能盡忠竭節對敷王休策蹇
勵駑祇奉皇眷而反憑附城社蔽虧日月請託公行交遊
羣小貪冶容之美原有罪之涓于恐漏洩其謀殞無辜之
正義雖挾山超海之力望此猶輕迴天轉日之威方斯更
劣此而可恕孰不可容金風屆節玉露啟塗霜簡與秋典
共清忠臣將鷹鷂並擊請除君側少答鴻私碎首玉階庶

明臣節高宗以義方毀辱大臣言詞不遜左遷萊州司戶
參軍秩滿家於昌樂聚徒教授母卒遂不復仕進總章二
年卒年五十五撰筆海十卷文集十卷

徐有功國子博士文遠孫也舉明經累轉蒲州司法參軍
紹封東莞男爲政寬仁不行杖罰吏人感其恩信遞相約
曰若犯徐司法杖者眾必斥罰之由是人爭用命終於代
滿不戮一人載初元年累遷司刑丞時酷吏周興來俊臣
邱神勣王宏義等構陷無辜皆抵極法公卿震恐莫敢正
言有功獨存平恕詔下大理者有功皆議出之前後濟活
數十百家常於殿廷論奏曲直則天厲色詰之左右莫不

悚慄有功神色不撓爭之彌切尋擢秋官員外郎轉郎中
俄而鳳閣侍郎任知古冬官尙書裴行本等七人被構陷
當死則天謂公卿曰古人以殺止殺我今以恩止殺就羣
公乞知古等錫以再生各授以官仁申來效俊臣張知默
等又抗表請申大法則天不許之俊臣乃獨引行本重驗
前罪奏曰行本潛行悖逆告張知蹇與廬陵王反不實罪
當處斬有功駁奏曰俊臣乖明主再生之賜虧聖人恩信
之道爲臣雖當嫉惡然事君必將順其美行本竟以免死
道州刺史李仁褒及弟榆次令長沙又爲唐奉一所構高
宗末私議吉凶謀復李氏將誅之有功又固爭之不能得

秋官侍郎周興奏有功曰臣聞兩漢故事附下罔上者腰
斬面欺者亦斬又禮云析言破律者殺有功故出反囚罪
當不赦請推按其罪則天雖不許繫問然竟坐免官久之
起爲左臺侍御史則天特褒異之時遠近聞有功授職皆
欣然相賀有功嘗上疏論天官秋官及朝堂三司理甌使
愆失其略曰陛下卽位以來海內職員一定而天下選人
漸多掌選之曹用捨不平補擬乖次屬請公行顏面罔懼
遂使囂謗滿路怨讟盈朝浸以爲常殊無愧憚又往屬唐
朝季年時多逆節鞠訊結斷刑獄至嚴革命以來載祀遽
積餘風未殄用法猶深今推鞠者猶行酷法妄劾斷臣卽

按驗奏而劾之獲其枉狀請卽付法斷罪亦奪祿貶考以
慙其德其三司受表及理匭申寃使不速與奪致令擁塞
有理不爲申者亦望準前彈奏貶考奪祿臣昔處法緣蒙
擢用臣無以上答至造願以執法酬恩無縱詭隨不避強
禦猛噬驚擊是臣之分如蒙允納請降敕施行庶不越旬
時亦可以除殘革弊刑措不用天下幸甚後潤州刺史竇
孝謙妻龐氏爲奴誣告云夜解祈福則天令給事中薛季
昶鞠之季昶鍛鍊成其罪龐氏當坐斬有功獨明其無罪
而季昶等返陷有功黨援惡逆奏付法司結刑當棄市有
功方視事令史垂泣以告有功曰豈吾獨死而諸人長不